

## b

1. Al - ler - erst lebe ich mir wer - de Sit mîn sün - dic ou - ge siht Daz rei - ne  
lant und ouch die er - de Der man sô vil ê - ren giht. Mirst ge - schehen des  
ich ie bat, Ich bin ko - men an die stat Da got men - nisch - li - chen trat.

2. Schœniu lant rîch unde hêre,  
Swaz ich der noch hân gesehen,  
Sô bist duz ir aller êre.  
Waz ist wunders hie geschehen!  
Daz ein magt ein kint gebar  
Hêre übr aller engel schar,  
Waz daz niht ein wunder gar?

3. Hie liez er sich reine toufen,  
Daz der mensche reine si.  
Sit liez er sich hie verkoufen,  
Daz wir eigen wurden fri.  
Anders wæren wir verlorn.  
Wol dir, sper, kriuz unde dorn!  
Wê dir, heiden! deist dir zorn.

4. Do er sich wolte übr uns erbarmen,  
Hie leit er den grimmen tôt,  
Er vil rîche durch uns armen,  
Daz wir komen ûz der nôt.  
Daz in dô des niht verdröz,  
Dast ein wunder alze gröz,  
Aller wunder übergnoz.

5. Hinnen fuor der sun zer helle  
Von dem grabê da'r inne lac.  
Des was ie der vater geselle,  
Und der geist, den niemen mac  
Sunder scheiden: êst al ein,  
Sleht und ebener dannê ein zein,  
Als er Abrahâmê erschein.

6. Do er den tievel dô geschande,  
Daz nie keiser baz gestreit,  
Dô fuor er her wider ze lande.  
Dô huob sich der juden leit,  
Daz er hêrre ir huote brach,  
Und man in sit lebendic sach,  
Den ir hant sluoc unde stach.

7. Dar nâch was er in dem lande  
Vierzic tage: dô fuor er dar  
Dannen in sîn vater sande.  
Sinen geist, der uns bewar,  
Den sant er hin wider zehant.  
Heilic ist daz selbe lant:  
Sîn name ist vor gote erkant.

8. In diz lant hât er gesprochen  
Einen angeslichen tac,  
Dâ diu witwe wird gerochen  
Und der wise klagen mac  
Und der arme den gewalt  
Der dâ wirt an ime gestalt.  
Wol im dort, der hie vergalt!

9. Unser lantrechtære tihten  
Fristet dâ niemannes klage:  
Wan er wil zestunt dâ rihten,  
So ez ist an dem lesten tage:  
Swer deheine schult hie lâ  
Unverebenet, wie der stât  
Dort da er pfant noch bürgen hât!

10. Nû lâ, iuch des niht verdriezen  
Daz ich noch gesprochen hân.  
Ich wil iu die redê entsliezen  
Kurzlich und iuch wizen lân,  
Swaz got mit dem menschen ie  
Wunders in der werlt begie,  
Daz huob sich und endet hie.

11. Kristen, juden und die heiden  
Jehent daz diz erbe sî:  
Got müez ez ze rehte scheiden  
Durch die sîne namen dri.  
Al diu welt diu stritet her:  
Wir sîn an der rechten ger:  
Reht ist daz er uns gewer.